

**Стихиры Обрезания Господня на «Господи, воззвах», глас 8:
Да будут уши Твои // внимлюще гласу моления моего.**

Не устыдися Всеблагий Бог / плотским обрезанием
обрезатися, / но даде Самого Себе образ и начертание всем ко
спасению, / ибо закона Творец законная исполняет/ и пророков
проречения, яже о Нем./ Иже вся содержай горстию и пеленами
повивыйся, // Господи, слава Тебе.

Ины стихиры святого Василия, глас 4:

**Аще беззакония назриши, Господи, Господи, кто постоит?
/ /Яко у Тебе очищение есть.**

Иже тезоименитне наречен быв царствия, / егда царское ты
священие, Христов язык свят, / любомудрием и художеством,
отче, упасл еси, / тогда венцем ты украси царствия, Василие, /
царствующими Царствуйай и всех Господь, / Иже Рождшему
соединеный, / Присносущный Сын и Собезначальный. // Егоже
моли спасти и просветити души наша.

**Имене ради Твоего потерпех Тя, Господи, потерпе душа
моя в слово Твое, // упова душа моя на Господа.**

Святительства одеждами украшен, / радуяся, проповедал еси
Евангелие Царствия, Василие, / православия Церкви источив
учение. / Имиже ныне просвещаемы, / Единое Божество, еже во
Отце Вседержители, / и во Единородном Божии Слове, / и
Божественном Дусе, / богословим и славим, / в Трех Лицах
нераздельно. // Егоже моли спасти и просветити души наша.

**От стражи утрения до ночи, от стражи утрения,
// да уповает Израиль на Господа.**

Небесным спребывая ликостоянием / и соводворяся, отче
Василие, / ихже и житию поревновал еси / светлостью чистою
жития твоего, / еще с плотию живый с сущими на земли яко
безплотен. / Наслаждающийся Богодохновенным учением
твоим / от бед и тьмы неведения/ Христа, Бога нашего, моли //
спасти и просветити души наша.

Слава, глас 8:

Премудрости рачитель быв, преподобне, / и всех сущих, еже
к Богу, / предсудив сожительницу поучение смертное, / лепотно
житие препроводил еси, / ибо, плотския страсти / воздержания
крепостьми себе обложив/ и Божественнаго поучения законом,/
неработен душевный соблюл еси сан,/ добродетели богатством /
все плотское мудрование повинул еси духу. / Темже плоть и мир
возненавидев и миродержца, // предстоя Христу, проси душам
нашим велия милости.

И ныне, глас тойже (8 – й):

Сходяй Спас к роду человеческому/ прият пеленами повитие,/
не возгнушася плотскаго обрезания, / осмодневен по Матери,
Безначальный по Отцу, / Тому, вернии, возопиим: // Ты еси Бог
наш, помилуй нас.